



Komunikadu Imprensa
26 Agostu 2024

**Estrutura suku Bobocasse foin permeraves partisipa treinamentu asesu
ba justisa formál no Direitu Labarik**

Iha 16 Agostu 2024, JSMP fasilita treinamentu kona-ba asesu ba iha justisa formál no direitu labarik ba estrutura suku no comunidade suku Bobocasse iha Cede suku Bobocasse, Sub-rejiaun Administrativa Pante-Makasar Rejiaun Administrativu Espesiál Oekusi Ambeno (RAEOA).

Objetivu hosi treinamentu ne'e atu hasa'e koñesimentu membru konsellu suku no comunidade suku Bobocasse kona-ba oinsa asesu justisa formál, direitu labarik nian no serbisu rede referral sira.

“JSMP fiar katak informasaun sira ne'ebé fahe iha sesaun treinamentu ne'e importante no relevante ba membru konsellu suku no komuniade sira hotu atu hatene. Informasaun sira ne'e bele aumenta comunidade sira nia koñesimentu kona-ba oinsa mak bele asesu ba justisa formál, bele relata sira nia kazu sira envolve labarik tuir mekanizmu Rede Referral nian ka konsellu suku sira mós bele jere no refere tuir prosedimentu ne'ebé lei hatur ona, ” dehan Sr. Casimiro dos Santos, Diretor Ezekutivau Interinu JSMP.

Xefe suku Bobocasse iha nia intervensaun haktuir katak nia ho nia membru sira no comunidade haksolok tebes ho treinamentu ne'e tanba liuhosi treinamentu ne'e bele hasa'e sira-nia koñesimentu kona-ba lala'ok justisa formál, direitu labarik sira nian no hatene serbisu rede referral nian. Xefe suku ne'e hatutan liutan katak hafoin eleitu sai xefe suku Bobocasse, nia ho nia membru konsellu suku sira foin primeiraves tuir formasaun ne'e.

Matéria ne'ebé fahe iha sesaun treinamentu ne'e kompostu hosi definisaun kona-ba lei, definisaun krime, tipu krime, natureza krime, prosedimentu ba iha kazu krime, direitu labarik sira nian, lei relevante sira ne'ebé fó protesaun ba labarik sira no serbisu rede referral ba assistensia vítima kazu Violénsia Bazeia ba Jéneru (VBJ).

Depoisde rona tiha apresentasaun matéria sira hosi JSMP, participante balun hato'o sira ninia preokupasaun sira kona-ba baku fen no oan ne'e krime ka lae, fen rua ne'e kontra lei ka lae, laen kadeia tinan 2 fen bele hola fali mane seluk ka lae, no labarik sira ne'ebé inan-aman abandona ne'e krime ka lae.

Hatan preokupasaun sira, JSMP esplika katak baku fen no oan ne'e krime, se de'it mak baku nia fen no oan tuir Lei Penál sei ba kadeia tinan 3 ka selu multa ba estadu, hola feto ka hola mane laós atu baku, fen ka laen ne'e atu sai ita nia parseiru, kompleta malu iha familia la'ós atu baku.

Kestaun kona-ba fen rua, JSMP esplika katak Lei Sivil dehan kazamentu ne'e entre fetu ida ho mane ida ne'ebé iha ona idade adultu no tenke hakarak malu, maibé iha realidade iha Timor mane barak mak iha fen liu ida tanba sira hakarak malu (konsente) no mane responsabiliza na'in rua hotu no fen sira mós konkorda ho nia laen atu iha fen rua. Alende ne'e, iha ita nia Lei Penál la bandu mós bainhira ema halo relasaun seksuál ho konsentimentu, katak la obriga malu, ida ne'e fo dalan atu ema bele hola fetu rua ka liu.

Kestaun kona-ba laen kadeia tinan rua, fen bele hola fali mane seluk, JSMP hatan katak iha Kódigu Sivil ka Lei Sivil, artigu ida kona-ba anulasaun ba kazamentu nian mós haktuir katak bele halo anulasaun ba kazamentu kuandu parte ida hetan kondensasaun tanba omisídiu no iha artigu seluk mós haktuir katak kualkér kónjuje ida bele husu divórsiu kuandu ida seluk la halo tuir ona nia devér ka obligasun konjugál, tanba ne'e bainhira parte ruma sente nia direitu ne'e violadu nia bele apresenta separasaun ka divórsiu.

Iha kestaun abandona labarik, JSMP esplika kata tuir lei ina-aman iha obligasaun atu tau matan ba nia oan sira no fó alimentasaun, tanba ne'e ba inan-aman ne'ebé la halo tuir nia obligasaun tuir lei krime la halo tuir nia obligasaun alimentár no bele ba prisaun tinan 3 ka multa. Karik ita iha kazu hanesan ne'e iha ita nia comunidade, bele apresenta keixa ba prokuradór atu prosesu tuir lei no obriga inan-aman sira tau matan ba nia oan.

Partisipante sira ne'ebé partisipa iha treinamentu ne'e hamutuk ema na'in 32 ne'ebé kompostu hosi fetu na'in 12 no mane na'in 20 Partisipante sira ne'e kompostu hosi Xefi suku, OPS, xefe aldeia sira, lia na'in, delegadu/a, ema ho defisiénsia, no comunidade suku Bobocasse.

Treinamentu ne'e realiza hosi JSMP liuhosi Programa USAID Timor-Leste Advocacy Activity for Good Governance.

Atu hetan informasaun kompletu favor kontaktu:

Casimiro dos Santos

Diretor Ezekutivu Interinu JSMP

Diresaun e-mail: casimiro@jsmp.tl

Telefone: (+670) 33238883 | 77257466

Website: <https://jsmp.tl>

info@jsmp.tl